

In ulteriur casting il fevrer

16 giuvenils ein separticipai agl empren casting pil Musical Surselva

(anr/gv) Ad in empren casting pil musical «En 80 dis entuorn il mund», ha il reschissur Roland Körner beneventau 14 giuvenils ella sala dalla scola da Vella. En treis gruppas han quels giu la caschun da mussar el decuors d'in'ura lur habilitads el cantar ed el giugar. Il pedagog da teater ha schau cantar en gruppa e singul, ha schau ir in suenter l'auter sin tribuna per examinar co els semovan. Era sco singul sin tribuna, ha il reschissur mai schau ils giuvenils persuls. *Fabiola Spescha*, ina dallas participontas al musical: «Cun siu sustegn sun jeu buca sesentida persula. El ha fatg curascha. Sche jeu sai separticipar al musical, hai jeu en scadin cass la caschun d'emprender bia ton da giugar sco da cantar. »

Claudio Bezzola ha accumpignau ils participonts al casting al clavazin. Dapi 15 onns ei igl um da 44 onns coach da cant ella Svizra orientala. El ver senn dil plaid «coach» ha el accumpignau ils giuvenils. Gia suenter paucas minutas han quels cantau ensem las canzuns dil musical «Lady Marmelade» e «Proud Mary». *Roland Körner*: «Quei ei ina excellenta entschatta. Ils giuvenils ein oz nervus, enconuschan buca il text dallas canzuns e tuttina dattan els tut.» Sco el ha sincerau, han tut ils participonts digl empren casting tuts bunas premissas da separticipar al musical. Alla fin decida la giuria cun Körner, Bezzola, il musicist *Christoph Senn* e la commembera dil comite d'organisaziun *Petronella Cavegn* tgi che separticipescha allas emprovas.

Secund casting il fevrer

Daniel Blumenthal, il president dil Musical Surselva, ha assistiu agl ur il casting. Ina ga dapli ha el seschau entusiasmar dalla habilitads ed dil slontsch da Roland Körner e da Claudio Bezzola. «Igl ei bi da veser co els ein habels d'accumpignar ils giuvenils.» Per contonscher il diember sufficient da participonts al musical «En 80 dis entuorn il mund» previus igl atun 2019, organisescha Musical Surselva il fevrer proxim in ulteriur casting. Blumenthal conceda : «Nus havein forsa dau memia pauc temps per seconstituir. Las emprovas ein la primavera proxima ed aschia tonschi aunc da far in secund casting. Nus duvrein aunc entuorn diesch participonts. »